

ВО ВТОРНИК 3-Й СЕДМИЦЫ ПО ПАСХЕ

В ПОНЕДЕЛЬНИК ВЕЧЕРА,

На Господи воззвах: поставим стихов 6. И поем настоящая стихиры праздника

3. Глас 2-й:

Подобен: Егда от Древа:

Егда мироносицы Тя Христе, зело рано взыскаху всех Живота, миры и ароматы имущия идяху, и любовию плачущия, слышаху от гроба юношу глаголюща: престаните плачуще, обаче вашему спасению радующиеся возопийте всем: яко воста Господь.

Вемы, о благообразный Иосифе! тебе яко херувимскую колесницу, Царя Христа на раму своею понесша, и со Креста снемша, ублажаем руце твои, и очи божественнии: почитаем длани твои, имиже Солнца Слова и Бога, на гроб нося положил еси. Темже и память твою любовию почитаем.

Явился торжество нам боголепных мироносиц, и Иосифа честного, якоже другий рай, источник подай жизни: благодатныя воды источай миру, изливает восстания Христова струи тепле. Множества верных празднуют и взывают: слава давшему Свое Воскресение концем.

И Миней 3. Слава, и ныне: глас 2:

Мироносицы рано бывша, и гроб Твой со тщанием достигша, искаху Тебе Христе, во еже помазати пречистое тело Твое. И ангеловыми глаголы огласившеся, радостотворныя образы апостолом проповедаху, яко воскрес Начальник спасения нашего, пленивый смерть, миру же даруяй живот вечный и велию милость.

Таже: Свете тихий:

На стиховне стихиры, глас 2-й: Воскресна:

Христос Спас наш, еже на ны рукописание пригвоздив на Кресте заглади, и смертную державу упраздни: поклоняемся Его тридневному Воскресению.

Стих: К Тебе возведох очи мои:

Умилителен: **В**опию Ти Христе Спасе, мытаревым гласом: очисти мя якоже онаго, и помилуй мя Боже.

Стих: Помилуй нас:

Мученичен: **С**вятым мучеником молящимся о нас, и Христа поющим, всяка прелесть преста, и человеческий род верою спасается.

Слава, и ныне, глас 2-й:

Почто мира со слезами, о ученицы растворяете, камень отвалися, гроб истощися: видите тлю животом попоранную, печати свидетельствующя явственно, спящия люте стражники непокоривых, смертное спасется плотию

Божиею, ад рыдает. Текша радостию рцыте апостолом: умертвивый смерть Христос, перворожден из мертвых, вас предваряет в Галилеи.

Таже, Ныне отпушаеши: **Трисвятое. Тропар, глас 2-й:**

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

Слава: глас тойже.

Егда снизшел еси к смерти, животе безсмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же истления явился чуждь. Но возопийте: воскресе Господь, подай миру велию милость.

Аще ли имать святыи тропари, глаголем прежде тропари: Благообразный Иосиф: Слава: святаго: И ныне: Мироносицам женам: [Тропарь: Благообразный Иосиф: и тропарь воскресен: Егда снизшел еси к смерти: в вечер глаголем их прменяюще, во всю седмицу.

И отпуст.

ВО ВТОРНИК 3-Й СЕДМИЦЫ ПО ПАСХЕ
Во вторник 3-я седмицы по Пасце на Утрени

Начало обычное, якоже указася в понедельник вторья седмицы по Пасце.

На **Бог** Господь: тропарь, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость. [Дважды].

Слава: глас тойже.

Егда снизшел еси к смерти, животе бессмертный, тогда ад умертвил еси блистанием Божества. Егда же и умершия от преисподних воскресил еси, вся силы небесныя взываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же истления явился чуждь. Но возопийте: воскрес Господь, подай миру велию милость.

[Аще есть тропарь святого, глаголем тропарь прежде: Благообразный Иосиф: единожды. И тропарь: Егда снизшел еси: единожды. Слава: святого: И ныне: Мироносицам женам:]

По 1-м стихословии седальны, глас 2-й:

Недро пречистое в вышних не истощивый, погребение и Воскресение от всех приял еси: Господи слава Тебе.

Стих: Господи, да не яростию Твоею обличиши мене:

Аз есмь древо неплодное, Господи, умиления плода не нося отнюд, и посещения боюся, и огня онаго устрашаюся неугасимаго. Темже Тя молю: прежде оныя нужди обрати, и спаси мя.

Стих: Дивен Бог во святых Своих, Бог Израилев:

Мученичен: **П**росветивый святых Твоя паче злата, и прославивый преподобных Твоя яко Благ, теми умолен бывая Христе Боже, жизнь нашу умири, яко Человеколюбец, и молитву исправи яко кадило, едине во святых почивай.

Слава, и ныне: Богородичен:

Законов утаившия естества, Божественному рождеству девство совокупила еси: едина бо родила еси прежде Тебе Рождшагося безлетно. Темже Тя Богородице величаем.

По 2-м стихословии, седален праздника, глас 2-й:

Подобен: Вышних ища:

Мироносицы утро пришедшия, и гроб тощ видевшия, апостолом глаголаху: тление низложи державный, и сущия во аде исхити уз: проповедите дерзновением, яко воскрес Христос Бог, даруяй миру велию милость.

Слава, и ныне: тойже.

Воскресение Христово: и псалом 50. Канон праздника, со ирмосы на 8: и Миней на 4. Кондак и експостиларий праздника.

Песнь 1. Глас 2-й:

Ирмос: Моисейскую песнь восприимши, возопий душе: Помощник и Покровитель бысть мне во спасение, Сей мой Бог, и прославлю Его.

Распялся еси плотию, безстрастный естеством Отчим: прободен был еси в ребра, источивый миру кровь и воду: Ты Бог наш, и прославляем Тя.

Крест Твой почитаю, и погребение славлю Блаже, и пою, и покланяюся востанию Твоему, и зываю: Ты Бог наш, и прославляем Тя.

Аще и вкусил еси желчи, сладосте церковная, но источил еси нам нетление от ребр Твоих: Ты Бог наш, и прославляем Тя.

Вменился еси Спасе с мертвыми, мертвыя воздвигнувый, вкусил еси тли: истления бо всяко не познал еси: Ты Бог наш, и прославляем Тя.

Да веселится Сион, да радуется и небо, воскрес Христос, мертвыя воздвигнувый, песнословящия: Ты Бог наш, и прославляем Тя.

Плащаницами обвив Иосиф тело Твое Христе, во гробе нове положи Ты спасение: Ты же мертвыя яко Бог воскресил еси.

Слава: Всесвятая Троице, едино Божество, безначальная Единице, Отче и Сыне и Божественный Душе, спасай мир: Ты Бог наш, и прославляем Тя.

И ныне: Древнюю клятву разрешивши Чистая, во утробе Твоей возрастила еси нам благословение, Младенца родивши: Сей бо Бог, аще и плоть носит.

И святого Миней на 4.

Песнь 3.

Ирмос: Неподростовавший мой ум, плодоносен Боже покажи ми, делателю добрых насадителю благих, благоутробием Твоим.

Длани на Кресте простерл еси Иисусе, языки вся от прелести собрав, к познанию Твоему созвал еси Спасе.

Иудейстии людие Пилату вопиют: отпусти нам злодейственного разбойника, возми, возми распни Безгрешнаго.

Распеншуся Тебе Христе, помрачися свет, земля потрясется, и из гробов мертвии восташа мнози, страхом державы Твоя.

Предстоящи Кресту Агница Твоя Иисусе, плачем вопияше: камо идеши Сыне? камо грядеши Агнче, за всех заклавыйся?

Поклоняюся Твоему Кресту, воспеваю и погребение, почитаю страсти, и гвоздя руку, и копие Иисусе, и Воскресение Твое.

Воскресл еси Иисусе, пленен бысть враг, Адам избавися, и Ева с ним от уз и тли, Воскресением Твоим.

Слава: Со Отцем и Сыну и Духу Правому, единому Естеству поклоняюся и воспеваю, Лицы разделяя, и Существом соединяя.

И ныне Богородичен: Блаженна еси Чистая, из корене Иессеова сущая, из негоже жезл и цвет Христа, по плоти нас ради возрастившая.

И святого Минея на 4.

По 3-й песни, седален и кондак святого.

Песнь 4.

Ирмос: Еже от Девы Твое рождество пророк предзря, воспроповедаше вопия: слух Твой услышах, и убояхся, яко от юга и из горы святых приосененных пришел еси Христе.

Крестом пленил еси адово чрево, и совоздвигл еси мертвые, и смерти разрушил еси мучительство: темже иже от Адама поклоняющиеся, поем погребение Твое и востание Христе.

Благоволивый Спасе наш, за благоутробие милости пригвоздитися на Кресте, и от праотчия избавити ны клятвы, разреши узы многих моих согрешений: можеш бо, елика хочеш творити.

На Кресте пригвоздивый мою древнюю клятву, и источивый мне Спасе, благословение кровию от ребр Твоих, разреши узы многих моих согрешений: можеш бо, елика хочеш творити.

Ад Спасе, срет Тя в преисподних, огорчися помышляя, яко яже древле пожрети возможий, ныне неволею отдав, истязуется в дольних, и пленяемь и обнажаемь бывает мертвых.

Аще и камень запечатася с кустодиею, о беззаконнии врази, но воскрес Господь, якоже прорече, разрешая узы многих моих согрешений: может бо, елика хочет, творити.

Воскресый из гроба, и пленивый ада, и ожививый мертвые, и нетление источивший мне Твоим востанием, разреши узы многих моих согрешений: можеш бо, елика хочеш творити.

Слава: Пресущнаго Божества нераздельную славу, кто возможет изреци? Едино бо Естеством сущи Троица поется безначальная, срасленная яко Единица, в Троице певаемая Ипостасьми простыми.

И ныне, Богородичен: Во чрево Твое всельшагося безмужно рождающая Мати Дево Чистая, непрестанно моли яко Богородица, разрешити узы многих моих согрешений: можеша бо, елика хочеша помощи.

И святого Минея на 4.

Песнь 5.

Ирмос: Мглы души моя Спасе мой разгнав светом заповедей Твоих озари мя, яко един Царь мира.

Ты первую одежду мою, юже ми истка, увы мне, сеятель греха, совлека еси Спасе мой, облекся в мя.

Листвие смоковное сщи мне грех мой, увы мне, не сохранившему, Спасе мой, пречистую заповедь Твою, змиинным советом.

Уязвившуюся душу мою разбойническими помышленьми моими, представый иже от Марии, и елей возлияв, исцели Христос.

У Креста предстоящи Пречистая Богородица, матерски зываше: оставил Мя еси едину, о Сыне Мой и Боже!

Ты злоначального змия оружием Креста Твоего низложив, Твоим востанием, сокрушил еси жало смерти Иисусе.

Где твое, смерти, жало? где твоя, аде, победа? Адам да вопиет: сокрушился

Слава: Тебе Богу и Отцу, и Сыну, и Духу покланяюся, трем Ипостасем, и едино три верую, Существом единым.

И ныне, Богородичен: Тя безсеменным Рождеством родившую паче естества обновившаго естество, Христа единого Владыку воспеваем вернии.

И святого Минея на 4.

Песнь 6.

Ирмос: Во глубине греховней содержимъ есмь Спасе, и в пучине житейстей обуреваемъ: но якоже Иону от зверя, и мене от страстей возведи, и спаси мя.

Мертв есть ад, дерзайте земнороднии, Христос бо на Древе висий, верже оружие нань, и лежит мертв: яже бо имяше, пленися обнажився.

Пленися ад, дерзайте мертвии, и гроби отверзошася, востаните от ада, вопиет вам Христос, вся пришедый избавити от смерти и тли.

Мертвья якоже возмог пожерл еси иногда, ныне истязуемъ аде, отдаждь Ми, вопиет тебе Жизнодавец и Бог, вся пришедый избавити от несытаго твоего чрева.

Жены мироносицы, что тщитесь прочее? что же живому мира приносите, воскресе Христос, якоже предрече. Да престанут вапша слезы, прешедшия на радость.

Плащаницею Тя Христе обвив Иосиф благообразный, во гробе положи: миропомазав же разоренный Твоего телесе храм, привали камень великий ко гробу.

Господь воскрес пленивый врага, и узники исторгнув, возведе вся, и первозданного Адама, того возставляя, яко Благоутробен и Человеколюбец Бог.

Слава: Троицу во Единстве воспоим вернии, с Сыном Отца славяще, и Духа единосущна Сыну, и суща во Отце собезначального и присносущного Бога.

И ныне, Богородичен: Во чреве неводеланно зачала еси Чистая, нетления грозд, яко лоза: из неяже безсмертия токи, якоже вино нам источают вечную жизнь.

И святаго Минея на 4.

По 6-й песни кондак празднику: глас 2-й:

Радоватися мирноносицам повелел еси, плач праматере Евы утолил еси Воскресением Твоим Христе Боже, апостолом же Твоим проповедати повелел еси: Спас воскрес от гроба.

Икос:

На гроб Твой Спасе мирноносицы идущия, к себе недоумеваяхуся умом, и вещаху: кто нам камень отвалит гробный? И возревша видят, яко камень отвален бе, зраку же ангелову со одеянием дивляхуся: содержими же бяху трепетом, и бежати помышляху. и к ним юноша возопи: не бойтесь вы, Егоже ищите воста, приидите, видите место, идеже лежаше тело Иисусово, и скоро шедшия возвестите учеником: Спас воскрес от гроба.

Песнь 7.

Ирмос: Херувимы подражающе отроцы в пещи ликовствоваху, вопиюще: благословен еси Боже, яко истинною и судом навел еси сия вся, грех ради наших: препетый и препрославленный во вся веки.

Ты яко Человеколюбец, хотяй вся спасти от прелести, яже создал еси, претерпел еси пригвоздиться на Кресте: да погребенный образ страстьми, сей плотию Твоею обновиши Спасе, и ад низложив, воскресил еси и умершия с Собою.

На Кресте возвышаемь, вся призвал еси к Себе Щедре, якоже обещал еси Блаже: яко воистинну вся сия грехов ради наших пострадати благоволил еси. Темже и разбойнику райская врата отверзл еси Спасе.

Ты храм телесный воздвигл еси разоренный, тридневен из гроба, якоже обещал еси Блаже: да воистинну скажеша славу Твою, юже нам источаеши верою, узы разрешив, ихже держаше древле ад связанных.

О иудейское безумие! о неистовство беззаконных! Что неверное видевши, не веровасте Христу? яко немощныя, не словом ли воздвиже? Или яко весь мир Той не спасе ли, да уверяют вас поне воины, или воскресшие из мертвых.

О мертвевшии стражие ныне да глаголют, како украден бысть, Егоже не видеша неразумнии всегда? Аще бо воскресша не видеша, ни ощутиша, како украдена Сего разумети можашу когда? Да уверит вы поне камень сей, и погребальная Христова.

Что яко мертва блюдете? что печати на камени положите еврею, страхом боящегося крадения? Се воистинну гроб запечатлесе: како убо воскресе, аще не бы Бог был Христос? Да уверяют вы воскресшии, и видени бывшии многими.

Слава: Со Отцем славим Сына, и Духа Святаго, вопиюще непрестанным гласом: Троице единственное Существо, помилуй, спаси вся, в трех Лицах Единице ущедрившии ны, препрославленный Боже во веки.

И ныне, Богородичен: Во чреве Твоем Пречистая, како вместила еси Младенца, Егоже трепещут силы ангельския яко Бога? Разве якоже восхоте, якоже вестъ вселися, вся спасти хотяй от Адама земнородныя, разрешивый Адама клятвы оныя, снедию горькою.

И святаго Минея на 4.

Песнь 8.

Ирмос: В купине Моисею Девы чудо, на Синайстей горе, прообразившаго иногда пойте, благословите и превозносите во вся веки.

Солнечныя зари спрятахуся страхом Христовых страданий, и востаяху мертвии, и горы прекланяхуся, и колебашеся земля, и ад обнажашеся.

В пещи сущии иногда треблаженнии отроцы возвышающе руки, проображаху Блаже пречестный Крест Твой, имже низложил еси Христе вражию силу.

О иудее слепии прелестницы и преступницы, Христову Воскресению неверующии, яко ложному: что неверное видите, яко воскресе Христос, мертвыя воздвигый?

О иудее врази, аще и нам не веруете, ваша воины вы спросите, что пострадала они? Кто отваливый руками камень от гроба?

Кто просветивый слепцы, и прокаженные очистивый, и хромыя исправивый, и пешествовавый море немокренно яко сушу, аще не Христос Бог, мертвыя воздвигнувый?

Кто воздвигнувый мертва четверодневна из гроба, вдовича сына? кто стягнувый яко Бог разслаблена на одре, аще не Христос Бог, мертвыя воздвигнувый?

Благословим Отца, и Сына, и Святого Духа Господа.

Со Отцем Сына, и Духа Святого Святую Троицу в Божестве едином прославляем, вопиюще: Свят, Свят, Свят еси во веки.

И ныне, Богородичен: Во чреве Твоем Чистая, присноживотный хлеб, смешенный несмесо, смешением нашим, родила еси непреложно единого Христа Бога во двою существу.

И святого Минея на 4.

Поем Честнейшую:

Песнь 9.

Ирмос: Преестественно плотию зачешную во чреве, от Отца безлетно предвозсиявшее Слово, в песнях немолчных величаем вернии.

Иже на Кресте разбойника познавши Тя Бога, наследника соделал еси мысленному раю, еже помяни мя вопиюща, Всесильне Спасе.

Заушен нас ради, и оплеван был еси Иисусе от беззаконников, скрижали закона начертавый в Синаи, угоднику Моисею.

Отца и желчи Спасе, напоен был еси нас ради, давший нам тело и честную кровь, в снедь же и питие вечныя Твоя жизни.

В животворная ребра копием прободен быв Христе, пречистую Твою кровь, и честную воду источил еси миру, яко присноживотный источник.

Вменился еси в мертвых, оживлей мертвые: во гробе положен еси, истощивый гробы: пленил еси ад, воскресив Адама.

Воскресл еси Иисусе, связан бысть враг, пленился ад, испразднишася гробы, восташи дольнии, покланяющиеся Тебе Христе.

Слава: Безначален еси Отче, несозданен еси Сыне, сопрестолен и Душе Святой, едино [Сия три] Естеством, и три Лицы, едине Боже истинный.

И ныне, Богородичен: Да веселится Иессей, да ликовствует и Давид: се бо Дева Богорасленный жезл прозябе, цвет присноживотный Христа.

И святого Минея на 4.

Катавасия: Светися, светися

Ексапостиларий мирноносцам:

Жены услышите глас радования: мучителя ада поправый, от тли мир воздвиже, тецыте, другом рцыте Моим благовестия: хочу бо создание Свое радостию озарити, отонудуже прииде печаль. [Дважды.]

Слава и ныне, тойже.

На хвалитех, поставим стихи 4,

И поем настояция стихиры Осмогласника, глас 2-й:

Да рекут иудее, како воины погубиша стрегущии Царя? почто бо камень не сохрани Камене жизни? Или погребеннаго да дадят, или Воскресшему да поклонятся, глаголюще с нами: слава множеству щедрот Твоих, Спасе наш, слава Тебе. [Дважды.]

Беззакония моя презри Господи, от Девы рождейся, и сердце мое очисти, храм то твоя Святаго Твоего Духа: да мя не уничижиши от Твоего лица, безмерную имей милость.

Мученичен: **К**рест Христов восприемше святии мученицы, оружие непобедимое, всю диаволу крепость упраздниша, и приемше венцы небесныя, стена нам быша, о нас молящися.

Слава, и ныне: глас 2-й:

Мироносицы жены, утру глубоку, ароматы взявша, Господня гроба достигоша, яже не надехуся обретиша помышляху благоговеюще каменному отвалению, и друга ко друзей глаголаху: где суть печати гроба? где есть Пилатова кустодия, и опасное утверждение? Бысть же возвеститель не разумевающим женам, блистайся ангел, и глаголай к ним: что с рыданием ищите живаго и оживотворившаго род человеческий? Воста Христос Бог наш из мертвых яко всемогущ, подавая всем нам нетление и жизнь, просвещение и велию милость.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры праздника, глас 2-й:

Подобен: Егда от Древа:

Свет трисолнечный на земли днесь * ясно блистает, * и мрак взметет страстей, * является Воскресение Христово, * соблюдающее верныя: * апостольстии ликуют чини любовию, * Иосиф веселится, и мироносиц честных память * светлая венчает верно ** тех восхваляющия, и Божественное востание славящия.

Стих: Благоволил еси Господи землю Твою, * возвратил еси плен Иаковль.

Взет на рамо Иосифе, * в деснице Отчей Сына сидящаго, * миро неистощимое * с миря погребл еси, * мирови воскресение предложил еси гробу, * одевающегося светом яко ризою, * камением покрываеши неизреченно. * Темже Его поем песньми, ** светоносная страдания и Воскресение.

Стих: Милость и истина сретостеся, * правда и мир облобызастся.

Удивляется ангелов множество, * и тебе Иосифе зряще * Христа

погребаяща, * мир ублажает тя, вернии чудимся: * честное же Воскресение чтуще божественно, * и с мироносицами * тя тепле почитаем. * Темже и вопием непрестанно: ** молися с ними спастися и нам бед же и скорбей.

Слава, и ныне: глас 1-й:

Со страхом приидоша жены на гроб, ароматы тело Твое помазати тщаяся: и сие не обретше, недоумеваяхуся друга ко друзей, не ведуще Воскресения. Но предста им ангел, и рече: воскрес Христос, даруяй нам велию милость.

Таже, Благо есть исповедатися Господеви

Трисвятое. И по Отче наш:

Тропари праздника, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подай миру велию милость.

Слава: глас тойже.

Егда снизшел еси к смерти, животе бессмертный, тогда ад умертвил еси блистанием Божества. Егда же и умершие от преисподних воскресил еси, вся силы небесныя взываху: Жизнодавче Христе Боже наш, слава Тебе.

И ныне: глас тойже.

Мироносицам женам, при гробе представ ангел вопияше: мира мертвым суть прилична, Христос же истления явился чуждь. Но возопийте: воскрес Господь, подай миру велию милость.

Таже ектения: Помилуй нас Боже:

Час 1. И отпуст.

ВО ВТОРНИК 3-Й СЕДМИЦЫ ПО ПАСХЕ НА ЛИТУРГИИ

Блаженна от канона праздника, песнь 4-й, на 6.

Крестом пленил еси адово чрево, и совоздвигл еси мертвые, и смерти разрушил еси мучительство: темже иже от Адама покланяющийся, поем погребение Твое и востание Христе.

Благоволивый Спасе наш, за благоутробие милости пригвоздитися на Кресте, и от праотчия избавити ны клятвы, разреши узы многих моих согрешений: можеша бо, елика хочеша творити.

На Кресте пригвоздивый мою древнюю клятву, и источивый мне Спасе, благословение кровию от ребр Твоих, разреши узы многих моих согрешений: можеша бо, елика хочеша творити.

Ад Спасе, срет Тя в преисподних, огорчися помышляя, яко яже древле пожрети возмогий, ныне неволею отдав, истязуется в дольних, и пленяемъ и обнажаемъ бывает мертвых.

Слава: Пресущнаго Божества нераздельную славу, кто возможет изреци? Едино бо Естеством сущи Троица поется безначальная, срасленная яко Единица, в Троице певаемая Ипостасьми простыми.

И ныне, Богородичен: Во чрево Твое всельшагося безмужно рождающая Мати Дево Чистая, непрестанно моли яко Богородица, разрешити узы многих моих согрешений: можеша бо, елика хочеша помощи.

По входе тропарь, глас 2-й:

Благообразный Иосиф, с Древа снем пречистое тело Твое, плащаницею чистою обвив, и вонями во гробе нове покрыв положи: но тридневен воскресл еси Господи, подавай миру велию милость.

И тропарь, глас 2-й:

Егда снизшел еси к смерти, животе бессмертный, тогда ад умертвил еси блистанием Божества. Егда же и умершья от преисподних воскресил еси, вся силы небесныя взываху: Жизнодавче Христе Боже наш, слава Тебе.

И тропарь, глас 2-й:

Мироносицам женам, при гробе представ ангел вопияше: мира мертвым суть прилична, Христос же истления явился чуждъ. Но возопийте: воскресе Господь, подавай миру велию милость.

И храма святого: И тропарь святого, аще есть. Аще ли будет и другого святого тропарь, то рцы его: таже кондак храма. Слава: святого. Аще ли будет и другого святого кондак, такожде рцы его.

И ныне: таже кондак праздника, глас 2-й:

Радоватися мироносицам повелел еси, плач праматере Евы утолил еси Воскресением Твоим Христе Боже, апостолом же Твоим проповедати повелел еси: Спас воскресе от гроба.

Прокимен Апостола: Крепость моя и пенне мое Господь, * и бысть мне во спасение.

Стих: Наказуя наказа мя Господь, смерти же не предаде мя.

Апостол Деяний, зачало 18. [Деян. 8, 5 – 17.]

Во дни оны, Филипп сошед во град Самарийский, проповедаше им Христа: Внимаху же народи глаголемым от Филиппа единомушно, слышаще и видяще знамения, яже творяше: Дуси бо нечистии от многих имущих я, вопиюще гласом велиим, исхождаху, мнози же расслабленнии и хромии изцелишася: И бысть радость велия во граде том. Муж же некий, именем Симон, прежде бе во граде волхвуй и удивляя язык Самарийский, глаголя некоего быти себе велика, Емуже внимаху вси от мала даже до велика, глаголюще: сей есть сила Божия великая. Внимаху же ему, зане довольно время волхвования удивляше их. Егда же вероваша Филиппу благовествующу яже о Царствии Божии и о имени Иисус Христове, крещавшася мужие же и жены. Симон же и сам верова и крещься бе пребывая у Филиппа: видя же силы и знамения велия бываема, ужасен дивляшеся. Слышавше же иже во Иерусалиме апостоли, яко прият Самария слово Божие, послаша к ним Петра и Иоанна, Иже сошедше помолишася о них, яко да приимут Духа Святаго: Еще бо ни на единого их бе пришел, точию крещени бяху во имя Господа Иисуса: Тогда возложиша руце на ня, и прияша Духа Святаго.

Аллилуиа: Услышит тя Господь в день печали, защитит тя Имя Бога Иаковля.

Стих: Господи спаси царя, и услыши ны, воньже аще день призовем Тя.

Евангелие Иоанна, зачало 20. [Ин. 6, 27 – 33.]

Рече Господь ко пришедшим к Нему иудеом: делайте не брашно гиблющее, но брашно пребывающее в живот вечный, еже Сын Человеческий вам даст: сего бо Отец знамена Бог. Реша же к Нему: что сотворим, да делаем дела Божия? Отвеща Иисус и рече им: се есть дело Божие, да веруете в Того, Егоже посла Он. Реша же Ему: кое убо Ты твориши знамение, да видим и веру имем Тебе, что делаеши, Отцы наши ядоша манну в пустыни, якоже есть писано: хлеб с небесе даде им ясти. Рече убо им Иисус: аминь, аминь глаголю вам, не Моисей даде вам хлеб с небесе, но Отец мой дает вам хлеб истинный с небесе: Хлеб бо

Божий есть сходяй с небесе и давай живот миру.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскрес тридневен от гроба, и мертвыя воздвигнувший: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Хвалите Господа с Небес, хвалите Его в Вышних.
Аллилуиа, [трижды]